



KEMENTERIAN PEMBANGUNAN WANITA,
KELUARGA DAN MASYARAKAT

KENYATAAN MEDIA

JABATAN PEMBANGUNAN WANITA

PERTANDINGAN VIDEO KREATIF & SOAL SELIDIK MENGENAI GANGGUAN SEKSUAL BERSEMPENA KEMPEN HENTIKAN KEGANASAN DAN GANGGUAN SEKSUAL 2019

Kementerian Pembangunan Wanita, Keluarga dan Masyarakat (KPWK) melalui Jabatan Pembangunan Wanita (JPW) telah melancarkan Pertandingan Video Kreatif “Hentikan! Stop It!” dan Soal Selidik Mengenai Gangguan Seksual sebagai langkah advokasi dan pengumpulan input daripada masyarakat umum.

Bertemakan “Hentikan! Stop It!”, pertandingan video kreatif ini bertujuan untuk menggalakkan penglibatan masyarakat dalam memahami bagaimanakah setiap individu memainkan peranan dalam mencegah sebarang bentuk keganasan, termasuk gangguan seksual. Kementerian berharap pertandingan ini akan memberi inspirasi kepada golongan masyarakat, terutamanya anak-anak muda, untuk mencabar pemikiran dalam meningkatkan kesedaran tentang gangguan seksual secara efektif.

Penyertaan adalah terbuka kepada semua warganegara Malaysia (orang perseorangan/ kumpulan), organisasi (Awam/ Swasta/ NGO, dsb) serta pelajar Institut Pendidikan Tinggi Awam (IPTA), Institut Pendidikan Tinggi Swasta (IPTS) dan akan berlangsung selama 2 bulan bermula 5 Ogos 2019 sehingga 5 Oktober 2019. Terma dan syarat serta borang penyertaan Pertandingan Video Kreatif “Hentikan Stop It” boleh didapati di laman sesawang KPWKM www.kpwkm.gov.my atau Jabatan Pembangunan Wanita www.jpw.gov.my.

Kajian soal selidik atas talian mengenai gangguan seksual berlangsung selama sebulan bermula hari ini (5 Ogos 2019) sehingga 5 September 2019. Soal Selidik ini mengandungi 21 soalan yang akan menyentuh mengenai pemahaman, pengalaman dan cadangan tindakan lanjutan dari masyarakat dan akan mengambil masa lebih kurang 5 hingga 10 minit sahaja untuk dijawab. Borang Soal Selidik Mengenai Gangguan Seksual ini boleh didapati di laman sesawang www.kpwkm.gov.my dan www.jpw.gov.my serta di media sosial Kementerian dan Jabatan Pembangunan Wanita.

Kedua-dua inisiatif ini merupakan satu sesi libat urus inklusif yang mensasarkan semua golongan masyarakat, agar mereka berpeluang mengambil peranan aktif dengan

memberi input untuk digunakan dalam pengubalan dasar dan pelaksanaan inisiatif Kerajaan berkaitan isu gangguan seksual.

Majlis Pelancaran Pertandingan Video Kreatif “Hentikan! Stop It!” dan Soal Selidik Mengenai Gangguan Seksual telah disempurnakan oleh YAB Dato’ Seri Dr. Wan Azizah Dr. Wan Ismail, Timbalan Perdana Menteri merangkap Menteri Pembangunan Wanita, Keluarga dan Masyarakat, turut hadir di majlis tersebut, YB Puan Hannah Yeoh, Timbalan Menteri dan pengurusan tertinggi KPWKM serta agensi.

###

Disediakan oleh : Unit Komunikasi Korporat
Jabatan Pembangunan Wanita
Aras 25, Bangunan KPWKM,
Presint 4, WP Putrajaya

Tel : 03 8323 1884

Tarikh : 5 Ogos 2019